

दिनांक 07.09.2024

समय: 18.45 बजे

आकाशवाणी जयपुर—अजमेर
प्रादेशिक समाचार

- राज्य मांय केई ठौड़ां व्ही भारी बारिश ऊं जिन्दगी माथे असर पड़्यो—जयपुर, कोटा अजमेर अर उदयपुर संभाग मांय आवता दो दिन मांय कठे—कठे भारी बारिश रा आसार।
- मुख्यमंत्री भजन लाल शर्मा कह्यो —कुदरत री सार—संभाल सगळं री जिम्मेदारी।
- जोधपुर मांय वायुसेना रा मेगा मल्टीलेटरल युद्धाभ्यास तरंगशक्ति 2024 रा तहत आज हवाई करतब रो कार्यक्रम राख्यी ज्यो।
- प्रदेश मांय गणेश चौथ रो पर्व सिरधा भाव अर उमाव सागे मनायो जा रह्यो है।

000

राज्य मांय केई ठौड़ां ज़ोरदार मेह बरस रह्यो है। जयपुर मांय संवारे री पोर तीन— चार घंटा ताई बरस्या पाणी रे कारण केई हलकां मांय पाणी भर ग्यो। जिला कलेक्टर जितेन्द्र सोनी न्यारा—न्यारा हलकां रो दौरो कर र हालात रो जायजो लीनो। डीग अर भरतपुर मांय ई जोरदार बिरखा रा समाचार है। बारां मांय आखा दिन रूक—रूक मेह बरसतो रह्यो। पाली ज़िला रा सादड़ी, मारवाड़ जंक्शन अर रानी मांय मूसलाधार बरसात रा समाचार है। अजमेर मांय लगातार व्हे रही तेज़ बारिश ऊं जिन्दगी माथे घणो असर पड़्यो है। म्हाणी खबरनवीस बतायो के विधानसभा अध्यक्ष वासुदेव देवनानी अर विधायक अनीता भदेल अहलकारां सागे हालात माथे निजर बणायोड़ा है।

.....

करौली मांय ई तेज बरिश रे कारण जिला मुख्यालय अर हिण्डौनसिटी रा नीचला हलकां मांय पाणी भर ग्यो। मंत्री झाबर सिंह खर्चा पाणी भर्या हलकां रो दौरा कर र हालात रो जायजो ले रह्या है। पांचना बांध रा तीन दरुजा खोल र पाणी निकाळ्यो जा रह्यो है। जोधपुर मांय ई आज दोपहरां री बगत व्ह्या जोरदार मेह पाछे नीचला हलकां मांय पाणी भर ग्यो। टोंक मांय बीसलपुर बंधा रा 6 दरुजा खोल र बत्तो पाणी निकाळ्यो जा रह्यो है। सवाईमाधोपुर, दौसा, नागौर, कोटा अर झालावाड़ समेत केई जिलां ऊं ई तेज बरसात व्हेवण रा समाचार मिल्या है। ई बीचे केन्द्रीय मंत्री गजेन्द्र सिंह शेखावत अहलकारां ने पोकरण अर जैसलमेर हलका मांय घणी बिरखा रे कारण व्ह्या नुकसाण रो सर्वे कर र संबंधित परिवारां ने मदद दिरावण रा हुकम दीना। वे फलसूण्ड अर फूलासर हलका मांय भर्या पाणी ने बेगो ई निकाळबा रा हुकम ई दीना। मौसम विभाग रे मुजब लारला 24 घंटां मांय 30 ऊं बत्ती ठौड़ां भारी बरसात व्ही। मौसम केन्द्र जयपुर रा निदेशक राधेश्याम शर्मा बतायो के जयपुर, कोटा, अजमेर अर उदयपुर संभाग मांय आवता 48 घंटा मांय कठे-कठे घणी जोरदार बिरखा व्हेवण रा आसार है।

000

राज्य मांय मुख्यमंत्री वृक्षारोपण महाअभियान रा तैत 7 करोड़ ऊं बत्ता पौधा रोप्या जा चुक्या है अर 5 साल मांय 50 करोड़ पौधा रोपणो तैय करी ज्यो है। मुख्यमंत्री भजनलाल शर्मा आज जयपुर मांय स्वच्छ वायु दिवस रे मौके राख्यी ज्या जळसा मांय आ जाणकारी दीनी। वे कह्यो के राज्य सरकार पर्यावरण ने बचावण सारू लगातार काम कर रही है। मुख्यमंत्री कह्यो के मिशन हरियालो राजस्थान रा तहत 5 साल मांय 4 हजार करोड़ रुप्या रो निवेश करण री योजना है। वे कह्यो के आवता साल ऊं राज्य मांय ग्रीन बजट पेश करण रो फैसलो ई करी ज्यो है। मुख्यमंत्री कह्यो के प्रदूषण मुक्त राजस्थान बणावण सारू मोटा शहरां मांय बिजली चालण वाळी एक हजार बसां चलायी जावेला। वे कह्यो के कुदरत ने बचावण री म्हां सगळां री जिम्मेदारी है। मुख्यमंत्री कह्यो के पाणी री बर्बादी रोकण, थाळी मांय जरूरत रे मुजब ई भोजन लेवण अर गाड़ियां-मोटरां ने मिल र इस्तेमाल करण सरीखी न्हानी-न्हानी कोशिसां ऊं मोटा बदलाव लाया जा सके है। वे जनता ऊं जागरूक नागरिक रो कर्तव्य निभाता थकां प्रदूषण कम करण मांय सरकार री कोशिसा मांय भागीदार बणबा री

अपील कीनी। वे कह्यो के नेशनल क्लीन एयर प्रोगाम रा तहत वायु प्रदूषण री समस्या ने सुलझावण सारू राज्य स्तर री कार्य योजना बणायी ज्यी है अर घणा प्रदूषित 5 शहरां सारू शहरी कार्य योजना ई बणायी ज्यी है।

.....

कार्यक्रम मांय केन्द्रीय पर्यावरण, वन अर जलवायु परिवर्तन मंत्री भूपेन्द्र यादव कह्यो के देश रा 131 शहरां मांय नवाचार अर तकनीक रे जरिये पर्यावरण प्रदूषण कम करी ज्यो है। कार्यक्रम मांय स्वच्छ वायु सर्वेक्षण रा तहत तीन श्रेणियां मांय देश रा नौ शहरां ने ईनाम दे र नवाजी ज्यो।

000

राज्य मांय ज्यां परण्योड़ा जोड़ां अर रिलेशनशिप मांय रह रह्या जोड़ां ने खतरो है, वां री हिफाजत सारू मानक संचालक प्रक्रिया— एसओपी तैय करी ज्यी है। नागरिक अधिकारां रो काम देख रह्या अतिरिक्त पुलिस महानिदेशक भूपेंद्र साहू आ जाणकारी दीनी। वे बतायो के परण्योड़ा या सागे रह रह्या जोड़ां ने किण ई ऊं खतरो व्हे तो वे नामित नोडल अहलकार ने हिफाजत तैय करण सारू अर्जी दे सके है। ई सारू फोन नम्बर 112, महिला हेल्पलाइन नंबर 1090, राज्य स्तर री व्हाट्सएप हेल्पलाइन, पुलिस कंट्रोल रूम रा नम्बर या जिला स्तर माथे कंट्रोल रूम री मेल आईडी माथे अर्जी दी जा सके है। साहू बतायो के संबंधित जोड़ा नोडल अहलकार, एसपी अर पुलिस उपायुक्त कानी ऊं करी ज्यी व्यवस्था ऊं राजी नी व्हे तो वे जिला अर राज्य स्तर माथे पुलिस जवाबदेही समिति ने अर्जी दे सके है।

000

जोधपुर एयरबेस माथे चाल रह्या वायुसेना रा मेगा मल्टीलेटरल युद्धाभ्यास—तरंगशक्ति 2024 रा तैत आज हवाई करतबां रो कार्यक्रम राख्यी ज्यो। इण मांय वायुसेना रा जंगी जहाज अर सूर्यकिरण एरोबेटिक टीम प्रदर्शन कीनो। एयर शो मांय वायुसेना ऊं रिटायर व्ह्यो जंगी जहाज मिग-23 यूबी फ्लॉगर ई शामिल व्ह्यो। आज सूर्यकिरण टीम सागे लडाकू विमान सुखोई-30 एमकेआई रो ई प्रदर्शन राख्यी ज्यो। जगुआर, मिराज-2000 अर सी-130 विमान ई उड़ान भरी। सूर्यकिरण टीम रा हॉक जहाज करीब 300 किलोमीटर प्रति घंटा री रफ्तार सागे वर्टिकल क्लाइम्ब अर दूजा स्टंट्स सागे ई

तिरंगा रा केसरिया, धोळा अर हरया रंग रा फॉर्मेशन मांय उड़ान भरी। अ जहाज आकाश मांय दिल री आकृति बणायी।

000

प्रदेश मांय आज गणेश चौथ रो पर्व सिरधा भाव अर उमाव सागे मनायो जा रहयो है। जयपुर रा मोती डूंगरी गणेश मिंदर मांय तड़के ऊं ई जातरू पूगण लाग्या। सवाईमाधोपुर जिला रा त्रिनैत्र गणेश मिंदर मांय ई देश भर ऊं जातरू पूग्या। करौली जिला रा रारा शाहपुर मांय राख्यी ज्या मेळा मांय गृह राज्य मंत्री जवाहर सिंह बेढम ई सिरकत कीनी। जोधपुर मांय गणेश जी रा न्यारा—न्यारा मिंदरां मांय खास सिणगार करी ज्यो। शहर मांय 200 ऊं बत्ती ठौड़ां गणपति व्ही री मूर्तियां बिठायी ज्यी है। गणेश जी री मूर्तियां बिठावण सागे ई दस दिन रो गणेशोत्सव ई सरू व्हे ग्यो है। गणेश चौथ रे मौके रातानाड़ा गणेश मिंदर सामी खास मेळो भर रहयो है। सोजती गेट रा विघ्नविनाशक मिंदर मांय ई फूलां ऊं सोहवणी झांकी सजाई ज्यी। करीब 200 साल जूनी सिद्ध गणपति री मूरत ने मूंग, चावल, चणां, चंवला अर मोठ री दाळ ऊं बणायी ज्यी पोशाक पहनाई ज्यी अर गणेशजी ने मेवां री माळा पहरायी ज्यी। चूरू रा जूना गणेश मिंदर मांय संवारे ऊं ई मोटी तादाद मांय जातरू पूगण लाग्या। देपालसर रा मिंदर मांय मेळो भर रहयो है। पाली अर सांचौर मांय ई घरां अर पण्डालां मांय गणेश जी री मूर्तियां बिठायी ज्यी है। सीकर मांय फतेहपुर गेट रा विजय श्री गणेश मिंदर मांय ई मोटी तादाद मांय जातरू गजानन्द जी री पूजा कर रह्या है।

000

केन्द्रीय संचार ब्यूरो, सवाईमाधोपुर री ओर ऊं त्रिनैत्र गणेश मेळा मांय केन्द्र सरकार री जनता रा भला री न्यारी—न्यारी योजनावां रा बारा मांय संगोष्ठी अर होड़ां राख्यी ज्यी। ब्यूरो रा प्रभारी अधिकारी नेमीचन्द मीणा राष्ट्रीय पोषण मिशन, स्वच्छ भारत अभियान, फिट इण्डिया, डिजिटल इण्डिया अर मौसमी बीमारियां ऊं बचाव अर पौष्टिक आहार रा बारा मांय जाणकारी दीनी। कार्यक्रम मांय राख्यी ज्यी होड़ां जीतण वाळां ने ब्यूरो री ओर ऊं ईनाम दिया ज्या।

000